

Cantidad di defecto biblioteca San Nicolas

‘Nos ta bay sinta pafo ora ta hopi calor’



ORANJESTAD - Biblioteca Nacional San Nicolas ta un necesidad pa e alumnonan cu ta bay scol

na San Nicolas, pero na e momentonan aki e edificio ta den necesidad pa wordo drecha. Ta haci

hopi calor esaki ta causa cu no por brinda servicio adecua mas.

Den nos matutino ayera nos a publica algun di e problemanan cu tin na Biblioteca San Nicolas. Enfasis a wordo poni riba e aironan cu ya no ta funcionando mas, pero no ta esey so mester drecha na un edificio cu a wordo renoba na 2009.

Bon Dia Aruba a bay tira un bista y desde di entrada por a mira mas ariba na e edificio cu algun parti di e muraya, cerca di e dak (trabou di pleister) ya no t'ey mas. Ruthmila Lin kende ta hefe na Biblioteca Nacional San Nicolas, a splica cu esey ta parti di e cura cu cay abou algun tempo pasa: "Dios gracia cu no tabata tin ningun hende". Como cu e resto di e mesun seccion a keda pega pero no tabata mustra mucho stabiel, sra. Ruthmila a bisa cu a laga kita e parti pa e no cay y causa daño.

Calor inmenso

Si sigui bay paden ta sinti e calor di biaha. Eynan tin muchanan cu ta haciendo les, den calor y tur soda den nan uniform di scol, sin cu tin un cooler pa refresca. Bon Dia Aruba a puntra algun mucha con nan ta haya e ambiente den e biblioteca y con nan lesnan ta bayendo. Contestanan cu nos a ricibi ta: "Mi ta haci mi les pero ta hopi calor." "Nos no por uza e sala di computer mas pasobra no tin aircó." "Nos ta bay sinta pafo ora e ta hopi calor y despues bay cas." Nan



a bisa tambe cu nan ta desea cu e aircó por wordo drecha pa nan por sinta mas ora na e biblioteca.

Na e prome piso Bon Dia Aruba a tira un bista den e sala di computer cual tabata wordo uza pa algun alumno pero e sala no ta wordo uza na su maximo capacidad a pesar cu tin bon computer. E motibo ta pasobra e aircó a dañá desde di luna di maart. No por uza tur computer pasobra esakinan ta genera mas cayente, pues e vannan cu tin no ta yuda mucho como cu no tin circulacion di aire.

Lekmento di awa

Bon Dia Aruba a bay mas ariba tambe na e segundo piso unda cu un aircó ta trahando ainda. Esaki ta e unico aircó cu ta trahando ainda pa full e biblioteca. Pero e tambe ta wordo forsa kieren e no ta funcionando manera mester ta tampoco y den e area aki tambe tin algun van ta wordo uza pa tene e luga poco fresco. Sra. Ruthmila a muestra Bon Dia Aruba un parti di e dak cu ta habri como cu awa ta lek for di esaki riba tur e waya cu ta core den e blafon, esaki ta algo peligroso. Henter dia e awa ta lek tambe for di e aircó core riba vloer cual ta causa peliger, pero e lekmento aki ta dañando e dak di piso 1 tambe segun e awa ta lek y para. Varios aia Bon Dia Aruba a ripara cu e blafon ta manera hinchá. Segun sra. Ruthmila e ta e resultado despues cu awa a yobe y a lek paden. Tambe tin problema di paloma, houtluis den e palonan na e muraya, partinan di kozijn cu



ta cay y frusto na e hekinan di hero cu ta proteha e entrada di e biblioteca.

Seccionnan cu no ta wordo uza

Asina tin tres area mas cu no ta wordo uza mes cual ta e parti cu tin e bukinan di mucha, e parti cu ta organisa presentacion pa muchanan y tambe e seccion unda e muchanan mas grandi ta uza pa studia. E tres areanan aki particularmente ta mucho calor pa e muchanan. Bon Dia Aruba a puntra con e muchanan ta haya buki e ora ey di e area. Sra. Ruthmila a bisa cu e bukinan cu ta wordo uza mas hopi no ta wordo warda nan luga bek pa awo. E señora encarga cu e seccion ey ta tene nan cerca, pa ora un mucha tin mester di nan e tin nan banda di dje e ora ey no mester bay den e calor constantemente. □